

MINISTERIO DE AGRICULTURA, PESCA E ALIMENTACIÓN

7116 *REAL DECRETO 443/2007, do 3 de abril, polo que se modifica o Real decreto 385/2006, do 24 de marzo, polo que se establecen as bases reguladoras para a concesión de axudas destinadas á reconversión de plantacións de determinadas especies frutícolas. («BOE» 81, do 4-4-2007.)*

O Real decreto 358/2006, do 24 de marzo, polo que se establecen as bases reguladoras para a concesión de axudas destinadas á reconversión de plantacións de determinadas especies frutícolas, establece na súa disposición adicional única que a axuda se concederá sempre e cando a normativa sexa compatible co mercado común, o que implica que estea en concordancia coas directrices comunitarias sobre axudas estatais ao sector agrario (2000/C 28/02).

Co fin de garantir o cumprimento destas normas, e como consecuencia do intercambio de información coa Comisión Europea no proceso de compatibilización da axuda, é necesario modificar o citado real decreto.

En concreto, é preciso que a disposición recolla explicitamente a obriga por parte do beneficiario de incrementar a calidade ao realizar a nova plantación. Ademais, co fin de non fomentar incrementos de produción derivados da realización da nova plantación, é necesario especificar que non se subvencionarán incrementos de superficie.

Por outra parte e á luz da experiencia do primeiro ano de aplicación do réxime de axudas, considérase oportuno reducir a densidade mínima exixida para as novas plantacións de froiteiras de carabuña, xa que a actual resulta demasiado elevada para determinadas variedades e formas de cultivo que requiren un maior desenvolvemento deste.

Así mesmo, clarifícanse algúns aspectos que presentaron problemas de interpretación no citado primeiro ano de aplicación.

Ademais, recóllese a posibilidade de que os plans de reconversión poidan ser modificados, dado que estes poden ter unha duración de ata catro anos.

Na elaboración deste real decreto foron consultadas as comunidades autónomas e as entidades representativas dos sectores afectados.

Na súa virtude, por proposta da ministra de Agricultura, Pesca e Alimentación e logo de deliberación do Consello de Ministros na súa reunión do día 30 de marzo de 2007,

DISPÓN O :

Artigo único. Modificación do Real decreto 358/2006, do 24 de marzo, polo que se establecen as bases reguladoras para a concesión de axudas destinadas á reconversión de plantacións de determinadas especies frutícolas.

O Real decreto 358/2006, do 24 de marzo, polo que se establecen as bases reguladoras para a concesión de axudas destinadas á reconversión de plantacións de determinadas especies frutícolas, modifícase nos seguintes termos:

Un. A alínea g) do artigo 6.2 queda redactada nos seguintes termos:

«g) Unha xustificación técnico-económica da viabilidade do plan, con indicación, polo menos, das

produccións actuais e unha motivación pola cal se procede á arrinca e substitución das plantacións existentes, así como das melloras que se pretenden alcanzar nalgunha das características establecidas no artigo 10.d). Esta xustificación deberá incluír un plan de comercialización en que se xustifique que dispoñen de saídas normais no mercado para a nova produción.»

Dous. Engádese un novo parágrafo ao punto 3 do artigo 6 coa seguinte redacción:

«Non obstante, poderanse presentar modificacións dos plans de reconversión, de acordo co que establece a comunidade autónoma onde radique a plantación.

As modificacións poderán incluír, entre outras:

- a) O cambio de variedades ou especies que se plantarán na parcela obxecto de nova plantación.
- b) O cambio de parcelas nas cales está previsto realizar a nova plantación.
- c) Os cambios no calendario de execución do plan aprobado.
- d) Os cambios nos socios que participan no plan de reconversión, en caso de que este plan fose presentado por OPFH ou polas súas asociacións legalmente recoñecidas.
- e) As variacións das superficies que se van reconverter, no caso de plans de reconversión presentados por OPFH ou polas súas asociacións legalmente recoñecidas.»

Tres. Engádeselle un novo punto 5 ao artigo 7 coa seguinte redacción:

«5. A superficie subvencionable máxima por beneficiario será a correspondente á superficie arrincada. Non se subvencionarán polo tanto novas plantacións de maior superficie ás arrincadas.»

Catro. O artigo 10 queda redactado do seguinte modo:

«Artigo 10. *Obrigas dos beneficiarios.*

Ademais das obrigas indicadas no artigo 14 da Lei 38/2003, do 17 de novembro, xeral de subvencións, os beneficiarios destas subvencións terán as seguintes obrigas:

- a) Comunicar con antelación a data en que efectuará a arrinca das plantacións.
- b) Arrincar a plantación obxecto de subvención como máis tarde o 31 de marzo de 2011.
- c) Destruír as árbores arrincadas co fin de evitar a propagación de pragas e enfermidades.
- d) Realizar novas plantacións cunha variedade distinta á arrincada ou con outra especie das recollidas no artigo 1 desta disposición, de maneira que coa nova variedade ou especie se consiga unha mellora na calidade da froita. Esta mellora, cuxa avaliación lle compete á comunidade autónoma en cuxo territorio radique a plantación, deberase constatar nalgunha ou nalgunhas das seguintes características:

1.º Agronómicas:

Exixencias da variedade no relativo ao clima e ao solo.

Fisiopatías.

Resistencia fronte a pragas e enfermidades.

Necesidades de fertilización.

Outras características agronómicas que establece a comunidade autónoma.

2.º Comerciais:

Período de comercialización.

Características organolépticas do froito: color, forma, calibre, sabor, textura, olor.

Calidades para a manipulación, transporte e conservación.

Outras características comerciais que estableza a comunidade autónoma.

Estas novas plantacións realizaranse en calquera parcela da explotación, no prazo comprendido entre a notificación da concesión da axuda ao beneficiario e o 31 de marzo de 2011. Non obstante, as comunidades autónomas poderán establecer que, baixo responsabilidade do titular da explotación, este prazo comece unha vez que levantasen a acta de non-inicio das actuacións na parcela obxecto da reconversión.

e) A nova plantación deberá:

1.º Ter unha superficie mínima por parcela de 0,5 hectáreas. A este respecto, contabilizarase como a superficie dunha soa parcela a suma das superficies das parcelas baixo un mesmo linde común que formen unidades homoxéneas do mesmo cultivo froiteiro, a pesar de que teñan números de identificación distintos.

2.º Ter unha densidade igual ou superior a 350 árbores por hectárea no caso das froiteiras de carabuña e de 1.250 árbores por hectárea no caso das froiteiras de pebida. No caso de plantacións ecolóxicas, a comunidade autónoma poderá modificar esta densidade sempre que se xustifique tecnicamente.

3.º Ser realizada con material vexetal certificado. Cando non se poida dispor deste material vexetal certificado, poderase utilizar material vexetal CAC (Conformitas Agraris Comunitatis). En ambos os casos se deberá xustificar a súa orixe co correspondente albará, pasaporte fitosanitario e factura de compra a un viveirista co título de produtor seleccionador ou multiplicador de froiteiras.

f) Manter as novas plantacións cultivadas de maneira sustentable e en condicións de obter un rendemento óptimo de cultivo, de acordo coas condicións agroclimáticas da zona onde se encontren situadas, durante un período mínimo de cinco anos a partir da súa plantación.»

Disposición adicional primeira. *Modificación de plans de reconversión.*

En relación cos plans de reconversión presentados con anterioridade á entrada en vigor desta disposición, os beneficiarios deberán presentar un documento complementario no cal se especifiquen as melloras que se pretenden alcanzar nalgunha das características establecidas no artigo 10.d). Ademais, para os plans que aínda non fosen finalizados, poderase modificar a densidade das novas plantacións, sempre que se cumpra co mínimo establecido no artigo 10.e) 2.º

Disposición adicional segunda. *Prazos aplicables para o ano 2007.*

Para o ano 2007 ampliase o prazo de presentación de solicitudes que establece o artigo 5 do Real decreto 358/2006, do 24 de marzo, ata o 18 de maio, incluído, do citado ano.

A comunicación que lle debe realizar cada comunidade autónoma á Dirección Xeral de Agricultura, segundo establece o artigo 9.1 do Real decreto 358/2006, do 24 de marzo, realizarase ata o día 16 de xuño de 2007.

Disposición derradeira única. *Entrada en vigor.*

Este real decreto entrará en vigor o día seguinte ao da súa publicación no «Boletín Oficial del Estado».

Dado en Madrid o 3 de abril de 2007.

JUAN CARLOS R.

A ministra de Agricultura, Pesca e Alimentación,

ELENA ESPINOSA MANGANA

MINISTERIO DE ECONOMÍA E FACENDA

7285 *ORDE EHA/875/2007, do 29 de marzo, pola que se determina o contido e especificacións técnicas da información que se subministrará á base de datos nacional de subvencións regulada no Regulamento da Lei 38/2003, do 17 de novembro, xeral de subvencións. («BOE» 83, do 6-4-2007.)*

O Real decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións, establece no artigo 37 o contido da información que os obrigados definidos no seu artigo 36 deben subministrar á base de datos nacional de subvencións, á vez que prevé que o detalle desta información se determinará mediante orde do Ministerio de Economía e Facenda en colaboración coas administracións públicas afectadas.

Esta orde ten por obxecto establecer o contido e estrutura dos ficheiros informáticos para o intercambio de información, así como os procedementos para ese intercambio.

Esta orde ten carácter básico e dítase ao abeiro do disposto no artigo 149.1.13.^a, 14.^a e 18.^a da Constitución. Conforme a reiterada doutrina do Tribunal Constitucional (por todas, STC 131/1996), a condición básica dunha regulación pódese estender a unha norma de rango regulamentario, atendendo ao «carácter marcadamente técnico ou á súa natureza conxuntural e cambiante.» De acordo con este pronunciamento, débese entender que a regulación, a través deste instrumento normativo, das especificacións do contido e do procedemento da información que se subministrará á base de datos nacional de subvencións, en desenvolvemento do artigo 20 da Lei 38/2003, do 17 de novembro, debe ter, como a propia norma habilitante da cal deriva, substantividade básica.

Na súa virtude, dispoño:

Artigo 1. *Ámbito.*

Están obrigados a facilitar información á base de datos nacional de subvencións os órganos e entes previstos no artigo 36 do Regulamento da Lei 38/2003, do 17 de novembro, xeral de subvencións, co alcance previsto no seu artigo 35.

Artigo 2. *Detalle do contido da información que hai que subministrar.*

A información que se lle facilitará á base de datos nacional de subvencións terá o contido que, estruturado